

△八一三歲賦其二
 歌譚興方酣！ 渾忘八一三，
 誰復憶江南？ 屍橫黃歇浦，

談詩鐘

(五)

兆蓉

愚兄皆耽詩，先兄珪友（光誕）服務隴海鐵路多年，曩在鄭州西安等處，公餘之暇，迭邀集諸同好作擊鉢吟，其中頗多佳句可誦，茲瀏覽其遺集，特選錄詩鐘若干聯，分列于后，以供讀者欣賞：

前·大·第一唱

- (1) 大禍常從姑息肇，前功未許等閒隳。
- (2) 前山茶事忙三月，大海鹽租減近年。
- (3) 前哲亦曾遭世詬，大愚轉以得天全。
- (4) 前事噬臍談已晚，大才刮目見無多。
- (5) 前仇不復寧爲懦，大慾能蠲即是祥。
- (6) 前緣祇是酬恩怨，大節何曾計死生。
- (7) 前朝興替宮鶯曉，大宦居行幕燕詳。
- (8) 前朝謨誥皆文教，大國河山半武功。
- (9) 大局安危爭一着，前途行止慎三思。
- (10) 大地宣秋看落葉，前山示晚戀殘暉。
- (11) 前路風花收客集，大江文物入童謠。
- (12) 前賢眼底無纖芥，大匠胸中鮮棄材。
- (13) 大智若愚人莫測，前緣似夢我猶疑。

- (14) 大好疑塚猶欺世，前代迷樓尙陷人。
- (15) 前塵烟景胸頭盪，大塊文章眼底收。
- (16) 前書歲晚聊披素，大集兵餘一殺青。
- (17) 前朝陵寢遺民淚，大府盃盤百姓膏。
- (18) 大夢圓于炊黍頃，前嫌釋自負荆時。
- (19) 大莫能名天可則，前無所止水何之。
- (20) 大節不移頭斷可，前仇能報膝行甘。
- (21) 前茅未必皆深造，大器何妨待晚成。
- (22) 前寺鐘聲風遞出，大江帆影月移行。
- (23) 前途險惡居行慎，大局艱難寤寐勞。
- (24) 大才幾輩無微謗，前事平生却健忘。
- (25) 大局未安先借箸，前程尙遠快揚鞭。
- (26) 前功每爲微疵掩，大業終難一蹴期。
- (27) 前輩詩從鳴盛貴，大家文以起衰名。
- (28) 前情紅豆憐相憶，大夢黃梁惜早醒。
- (29) 大漠風狂沙作雨，前江潮落月籠烟。
- (30) 大惠忽加防賣我，前言猶在敢辜人。
- (31) 大江不管興亡事，前史兼收毀譽名。
- (32) 大封未竟先烹狗，前拒何期乃進狼。
- (33) 大權假手虞旁落，前事回頭悔倒行。
- (34) 大錯一時成鐵鑄，前嫌小頃付冰銷。
- (35) 前朝宮苑埋荒草，大地河山剩劫灰。
- (36) 大有生機胡自餒，前無去路莫窮追。
- (37) 大石蹲途形似虎，前溪繞屋勢如蛇。
- (38) 前門拒虎猶遺患，大府鳴騶自作威。

(未完)